

**Фавкуллда вазиятлар вазирлиги хузуридаги
Илмий-техник кенгаш тўғрисидаги
НИЗОМ**

I-боб. Умумий қоидалар

1. Ушбу Низом Ўзбекистон Республикаси Фавкуллда вазиятлар вазирлиги хузуридаги Илмий-техник кенгашнинг (кейинги ўринларда - Илмий-техник кенгаш деб юритилади) асосий вазифалари, функциялари, ҳуқуқ ва мажбуриятларини ҳамда фаолиятини ташкил этиш тартибini белгилайди.

2. Илмий-техник кенгаш Фавкуллда вазиятлар вазирлиги (кейинги ўринларда - вазирлик деб юритилади) ваколагига кирувчи вазифалардан келиб чиққан ҳолда, илмий - техник муаммолар, илмий - тадқиқот ва тажриба - конструкторлик ишларини кўриб чиқиш, хулоса бериш, тасдиқлаш ва амалиётга татбиқ этилишининг назоратини мувофиқлаштирувчи орган ҳисобланади.

3. Илмий-техник кенгаш ўз фаолиятида Ўзбекистон Республикаси Конституциясига, Ўзбекистон Республикаси Олий Мажлиси палаталари қарорларига, Ўзбекистон Республикаси Президентининг Фармонлари, қарорлари ва фармойишларига, Ўзбекистон Республикаси Вазирлар Маҳкамасининг қарорлари ҳамда фармойишларига, Фавкуллда вазиятлар вазирининг буйруқлари ва кўрсатмаларига ҳамда ушбу Низомга ва бошқа қонун ҳужжатларига амал қилади.

4. Илмий-техник кенгаш вазирлик, унинг ҳудудий бошқарма ва таркибий тузилмалари, республиканинг тегишли вазирлик, идора, илмий-тадқиқот институтлари ва бирлашмалари мутахассислари таркибидан ташкил этилади. Илмий-техник кенгаш Низоми ва унинг таркибини тасдиқлаш ҳамда ўзгартишлар киритиш Фавкуллда вазиятлар вазири буйруғи билан амалга оширилади.

5. Вазирлик тизимида илмий-тадқиқот ва тажриба-конструкторлик ишлари яқунлари Илмий-техник кенгаш муҳокамасига киритилади ва амалиётга татбиқ этиш масаласи кўриб чиқилади.

6. Илмий-техник кенгаш кун тартибидаги долзарб масалалар Аҳоли ва ҳудудларни табиий ҳамда техноген хусусиятли фавкуллда вазиятлардан муҳофаза қилиш, шунингдек фуқаро муҳофазаси соҳасидаги илмий ишларни ривожлантириш бўйича идоралараро кенгаш (кейинги ўринларда - Идоралараро кенгаш деб юритилади) муҳокамасига киритилади.

7. Илмий-техник кенгаш қарори вазирлик Марказий аппарати бош бошқарма, бошқарма, мустақил бўлим ва хизматлари ҳудудий бошқарма ва таркибий тузилмалари томонидан ижро учун мажбурий ҳисобланади.

II-боб. Илмий-техник кенгашнинг асосий вазифалари ва функциялари

8. Илмий-техник кенгаш ўз фаолиятида қуйидаги вазифаларни амалга оширади:

вазирликнинг табиий ҳамда техноген хусусиятли фавқулодда вазиятларни олдини олиш, уларнинг профилактикасини амалга ошириш, фавқулодда вазиятлар содир бўлганда республика аҳолиси ва ҳудудларини муҳофаза қилишга қаратилган мақсадли илмий-техник ва тажриба - конструкторлик фаолиятини ташкил этишга кўмаклашиш;

табиий ва техноген хусусиятли фавқулодда вазиятларни олдини олиш ва уларни бартараф этиш, фуқаро муҳофазаси, ёнгин хавфсизлигини таъминлаш, сейсмик кузатувлар, кичик ҳажмли кемалардан хавфсиз фойдаланиш, сув объектларида фуқароларнинг ҳаёти ва соғлигини муҳофаза қилиш, шунингдек фавқулодда вазиятларда иктисодиёт объектлари фаолиятининг барқарорлигини ошириш соҳасидаги мақсадли илмий-техник дастурлар ишлаб чиқишини ташкил этиш ва уларнинг бажарилишини мувофиқлаштириш;

аҳолини юзага келиши мумкин бўлган фавқулодда вазиятлардан муҳофаза қилиш мақсадида ишлаб чиқилган илмий-тадқиқот ишлари, тажриба - конструкторлик ишланмалари лойиҳаларини белгиланган тартибда кўриб чиқиш, қайта ишлаш ва амалиётга татбиқ этишни мувофиқлаштириш.

9. Илмий-техник кенгаш ўз зиммасига юклатилган вазифалар доирасида қуйидаги асосий функцияларни бажаради:

вазирлик фаолиятини такомиллаштиришга қаратилган, илмий асосланган концептуал ва стратегик ҳужжатлар лойиҳаларини кўриб чиқиш ва белгиланган тартибда таклифлар киритиш;

вазирлик тизимида соҳага оид мавжуд муаммоли масалаларни аниқлаш, ўрганиш, таҳлил қилиш ва уларни бартараф этишга қаратилган мақсадли дастурларни ишлаб чиқишда кўмаклашиш;

тажриба-конструкторлик ишланмаларини, замонавий техника, қидирув - қутқарув асбоб-анжомларини қўллаш бўйича синов натижалари ва лаборатория текшируви хулосалари асосида амалиётда қўллаш, ишлаб чиқариш, сотиб олиш ҳамда баҳолаш масалалари бўйича хулосалар тайёрлаш;

аниқ мақсадли йўналишдаги илмий изланишлар бўйича бажарилган ҳисоботларни муҳокама қилиш, тугалланган ишлар, шу жумладан, фуқаро муҳофазаси йўналишида бажарилган ишларга хулосалар ҳамда уларни татбиқ этиш бўйича илмий-амалий тавсиялар бериш;

вазирлик ваколати доирасида илмий-тадқиқот ва тажриба-конструкторлик ишлари натижаларини экспертизадан ўтказиш, улардан фойдаланиш ҳамда ишлаб чиқаришни мақсадга мувофиқлиги тўғрисида хулосалар тайёрлаш;

аҳоли ва ҳудудларни фавқулодда вазиятлардан муҳофаза қилиш бўйича устувор йўналишлардаги илмий-тадқиқотларни кўриб чиқиб, Идоралараро кенгашга белгиланган тартибда тавсияларни тайёрлаш ҳамда тақдим этиш;

илмий ишларни ривожлантириш бўйича анжуманлар, семинарлар, кўرғазмалар ва бошқа илмий-амалий тадбирларни ташкил этиш ҳамда ўтказиш;

аҳоли ва ҳудудларни муҳофаза қилиш соҳасида амалга оширилаётган илмий ишлар, уларнинг натижадорлиги ҳамда хорижий давлатларнинг илғор

тажрибаси бўйича маълумотлар базасини яратиш, янгилаб бориш ва илмий ишлар тўпламлари нашр этилишини ташкил қилиш;

вазирлик фаолиятида илмий ишларни ривожлантириш бўйича норматив - ҳуқуқий ҳужжатлар лойиҳаларини ишлаб чиқиш ҳамда такомиллаштиришни ташкил этиш ва амалга ошириш;

вазирлик ваколати доирасида илмий-тадқиқот, тажриба-конструкторлик, ўқув-услугий ишлар лойиҳаларини кўриб чиқиш ва эксперт хулосаларини бериш;

аҳоли ва ҳудудларни табиий ҳамда техноген хусусиятли фавқулодда вазиятлардан муҳофаза қилиш соҳасида илмий-тадқиқот ва экспериментал ишланмалар натижаларини амалиётга татбиқ этиш бўйича тавсиялар ишлаб чиқиш ҳамда вазирлик раҳбарияти ва Идоралараро кенгашга тақдим этиш;

илмий-тадқиқот ва тажриба-конструкторлик ишлари натижаларининг амалиётга татбиқ этилиши мониторингини юритиш.

III-боб. Илмий-техник кенгашнинг ҳуқуқ ва мажбуриятлари

10. Илмий-техник кенгаш қуйидаги ҳуқуқларга эга:

ўз ваколатига кирадиган масалалар бўйича вазирликнинг ҳудудий бошқарма ва таркибий тузилмаларидан, вазирлик ва идоралар ва бошқа ташкилотлардан маълумот сўраб олиш;

вазирликнинг ҳудудий бошқарма ва таркибий тузилмалари томонидан аҳоли ва ҳудудларни фавқулодда вазиятлардан муҳофаза қилиш, шунингдек фуқаро муҳофазаси масалалари бўйича олиб борилаётган илмий-тадқиқот ҳамда тажриба-конструкторлик ишлари ҳолати билан танишиш ва уларга баҳо бериш;

илмий-тадқиқот, тажриба-конструкторлик ишларининг самарадорлигини оширишга қаратилган тавсиялар ишлаб чиқиш;

истикболсиз ва долзарб эмас деб баҳоланган, сифатсиз, тўлақонли якунига етказилмаган илмий-тадқиқот, тажриба-конструкторлик ишларини тўхтатиш ва қайта ишлаш учун муаллифга қайтариш;

илмий ишларнинг ҳолатини ўрганиш учун ишчи комиссиялар ва эксперт гуруҳлар ташкил этиш, шунингдек, ушбу комиссия ва гуруҳлар фаолиятига тегишли мутахассисларни жалб қилиш;

илмий ишларни ривожлантиришда фаол иштирок этган вазирлик ходимларини рағбатлантириш ташаббуси билан чиқиш.

Кенгаш қонун ҳужжатларига мувофиқ бошқа ҳуқуқларга ҳам эга бўлиши мумкин.

11. Илмий-техник кенгаш ўзига юкланган вазифалар ва функцияларнинг самарали бажарилиши учун масъулдир.

IV-боб. Илмий-техник кенгаш фаолиятини ташкил этиш

12. Илмий-техник кенгашнинг раис, раис ўринбосари ва аъзоларидан иборат таркиби Фавқулодда вазиятлар вазири томонидан тасдиқланади.

13. Илмий-техник кенгаш Фавқулодда вазиятлар вазирлиги ҳудудий бошқарма ва таркибий тузилмаларининг илмий-тадқиқот, тажриба - конструкторлик фаолияти билан бевосита боғлиқ бўлган, назарий ҳамда амалий тажрибага эга бўлган мутахассис ходимлар таркибидан шакллантирилади.

14. Илмий-техник кенгаш фаолият заруриятдан келиб чиққан ҳолда, илмий-тадқиқот ишлари натижаларини кўриб чиқиш учун бошқа вазирлик ва идоралар мутахассисларини жалб этиши мумкин.

15. Илмий-техник кенгаш ўз фаолиятини доимий асосда амалга оширади ва мажлисларини заруратга кўра, аммо ҳар йилда камида икки марта ўтказилади.

16. Вазирлик ҳудудий бошқарма ва таркибий тузилмалар бошлиқлари (командирлари) Илмий-техник кенгаш ва унинг аъзолари фаолияти учун зарурий ҳамда қулай шарт-шароит яратиш учун масъулдир.

17. Илмий-техник кенгаш раиси:

Илмий-техник кенгаш фаолиятига умумий раҳбарлик қилади;

Илмий-техник кенгаш раиси ўринбосари ва аъзолари ўртасида вазифаларни тақсимлайди;

Илмий-техник кенгаш мажлисларини чақиради ва уларга раислик қилади;

Илмий-техник кенгаш мажлислари кун тартибини тасдиқлайди;

Илмий-техник кенгаш иш режаларини тасдиқлайди.

Илмий-техник кенгашнинг самарали ишлашини таъминлаш бўйича бошқа вазифаларни амалга оширади.

18. Илмий-техник кенгаш аъзоси кун тартибидаги масалаларни муҳокама қилиш, ҳар бир муҳокама қилинаётган масалага ёзма фикр бериш, Илмий-техник кенгаш иш режасини тузишда қатнашиш, Илмий-техник кенгаш йиғилишини тайёрлаш, ҳужжатлар билан яқиндан танишиш, ўз фикр-мулоҳазаларини киритиш, Илмий-техник кенгаш ишида овоз бериш ҳуқуқидан фойдаланиш, Илмий-техник кенгаш таркибининг ҳар бир аъзоси алоҳида ёки гуруҳ бўлиб Кенгаш ваколати доирасидаги масалалар бўйича лойиҳаларни муҳокамага киритиш ҳуқуқига эга.

19. Илмий-техник кенгаш ишчи органи функциясини Фавкулудда вазиятлар вазирлиги Фан, инновацион ривожланиш ва ўқитишни ташкил этиш бўлими (кейинги ўринларда - Ишчи орган деб юритилади) бажаради.

20. Ишчи орган:

Илмий-техник кенгашнинг иш режаларини ишлаб чиқади, уларнинг ижроси юзасидан назоратни амалга оширади;

тасдиқланган иш режасига мувофиқ Илмий-техник кенгашнинг фаолиятини ташкил этади;

Илмий-техник кенгаш мажлислари кун тартибига киритиладиган масалалар бўйича материалларнинг тайёрланишини ташкил қилади;

Илмий-техник кенгашнинг ваколати доирасига кирувчи масалалар юзасидан қарорлар ва бошқа ҳужжатлар лойиҳаларини тайёрлайди;

Илмий-техник кенгаш қарорларининг ижроси юзасидан назорат ва мониторингни ташкил қилади, натижалари бўйича Илмий-техник кенгаш раисига ахборот бериб боради ҳамда таҳлилий ва бошқа материалларни навбатдаги мажлисда кўриб чиқиш учун тайёрлайди;

оммавий ахборот воситалари билан ўзаро ҳамкорлик қилади.

Ишчи орган қонун ҳужжатларига мувофиқ бошқа функцияларни ҳам амалга ошириши мумкин.

21. Фавкулудда вазиятлар вазирлиги Фан, инновацион ривожланиш ва ўқитишни ташкил этиш бўлими катта офицери - Илмий-техник кенгаш котиби ҳисобланади.

22. Илмий-техник кенгаш котиби:

Илмий-техник кенгаш мажлислари ўтказилишини ташкил этади;

барча зарур ҳужжатларнинг навбатдаги мажлисга тўпланиши, умумлаштирилиши ва Илмий-техник кенгаш раисига тақдим этилишини таъминлайди;

Илмий-техник кенгаш раиси билан мажлиснинг ўтказиш муддати ва жойини ҳамда таклиф этиладиганлар рўйхатини келишади;

Илмий-техник кенгаш аъзоларига ва таклиф этилганларга мажлиснинг ўтказиладиган санаси, вақти ва жойи, кун тартибидаги масалалар тўғрисида ёзма хабарномани йиғилишдан камида уч кун аввал юборади;

Илмий-техник кенгаш баённомаларини расмийлаштиради ва тасдиқланган баённомаларни унинг аъзоларига ва иштирокчиларга юборади.

23. Илмий-техник кенгаш мажлисини унинг раиси бошқаради. Илмий-техник кенгаш раиси бўлмаган тақдирда мажлисни унинг ўринбосари бошқаради.

Илмий-техник кенгаш мажлиси унда аъзоларнинг камида учдан икки қисми қатнашган тақдирда ваколатли ҳисобланади. Зарур миқдордаги аъзолар йиғилмаган ҳолатларда Илмий-техник кенгаш мажлиси бошқа муддатга қолдирилади.

24. Илмий-техник кенгаш қарорлари унинг мажлисида иштирок этган аъзоларининг тўғридан-тўғри кўпчилик овози билан қабул қилинади. Овозлар тенг бўлган тақдирда Илмий-техник кенгаш раисининг овози ҳал қилувчи овоз ҳисобланади.

25. Илмий-техник кенгаш қарорлари мажлисда иштирок этган аъзолари томонидан имзоланади ва Илмий-техник кенгаш раиси томонидан тасдиқланадиган баённома билан расмийлаштирилади. Баённомани имзолашда Илмий-техник кенгаш аъзолари ўзларининг алоҳида фикрларини ёзма равишда билдириш ҳуқуқига эга.

26. Вазирлик ҳудудий бошқарма ва таркибий тузилмалари соҳага оид илмий-тадқиқот ва тажриба-конструкторлик фаолияти бўйича ҳар йил якунида ҳисобот тайёрлайди ва Илмий-техник кенгашга тақдим этади.

27. Илмий-техник кенгашнинг иш режалари, унинг аъзоларидан келиб тушган таклифлар асосида бир йил учун тузилади ва мажлисида кўриб чиқилиб, Илмий-техник кенгаш раиси томонидан тасдиқланади.

V-боб. Яқунловчи қоидалар

28. Илмий-техник кенгаш фаолиятини қайтадан ташкил этиш ёки фаолиятини тугатиш Фавқулодда вазиятлар вазирининг буйруғи асосида амалга оширилади.